

政以下至九品或習弓馬或有才略之人別為抄擇或親試射御或策方略多方勸勵成就其中材器特異者不次擢用預為養望以備他日之用且評事之職乃古掌書記之任古之儒將多由此出臣等聞祖宗朝有兵馬節度使處皆有評事後來只於咸鏡北道平安道有之他皆革去是必重西北而輕南方也今防備之勢無南北輕重之異宜於有兵馬節度使處皆設評事以所抄文臣差之佐軍政習邊事則雖無監軍御史大小邊將自然有所忌憚不敢縱意為非然則一舉而兩全矣答曰皆如啓戊子夜坤方如火氣

己丑 上名對○日微暈

庚寅日微暈

辛卯濟州牧使金秀文馳啓曰本月二十一日倭船四十餘隻自甫吉島直向州前距州一里許因下碇留泊命名三公及備邊司堂上會議于賓廳傳曰全羅道賊倭近不現形意其已還本土矣今又見形於濟州云若下陸則後兵及善射人當多抄入